

Gij Riz Ribfwngz Gwnz Maknim

椰子果上的指甲印



Lingzlwg caeuq malwg youq ranz bouxcawj. Ngoenz he, yawjraen laeq lwgnyez ranznden gwn maknim, songde myaiz cungj rwi lo, siengj bae gwnz ndoi gwn maknim. Hoeng, bouxcawj gam ndaej gig yiemz, songde mbouj miz fap okbae.

Seizgan gig vaiq couh daengz caetnyied cibseiq, ranzranz hek bae hek dauq, bouxcawj nyaengq gvaq ciet, mbouj ndaejhoengq guenj gyoengqde lo.

Malwg iu lingzlwg naeuz: "Raeuz bae gwnz ndoi gwn maknim ba."

Lingzlwg naeuz: "Dingq bouxcawj gangj caetnyied cibseiq dwg

ngoenzciet duzfangz, de gaenq daengq lwgnyez gaej ok rog bae guhcaemz ne."

Malwg naeuz: "Gaej laudai lai, gijneix dwg yaeuh vunz, gaenbonj mbouj miz fangz. Gaej lau, miz gou ne!"

Lingzlwg siengj daengz ngoenz-naengz malwg lienx bouxcaeg hix gamj haeb, couh dapwngq lo.

Daengngoenz ndongqmyanmyan, ndit haenq mbwn oemq. Songde ok mbanj, haeuj lueg, mbouj geij nanz couh daengz ndoi maknim lo.

Baez raen maknim, songde couh angqvauvau buet gvaqbae.

Lingzlwg naeuz: "Daeggo, aenheu aenhoengz caengz baenz, mbouj ndei gwn, aeu gwn aenndaem, lij aeu haeujsim gaej gwn deng aennaeh."

Malwg mbaet aen maknim ndaemndwtndwt bongzbebe daeuj mbik hai baez yawj: "Aeya, aen neix yawj hwnjbae baenzneix ndei, ndawde vihmaz miz non ha?" Lingzlwg gvaqbae baez yawj, riu lo: "Haha! Aen maknim neix ndei raixcaix, gijneix mbouj dwg non, dwg sim mak!" Malwg sikhaek dawz maknim oet haeuj bak bae gwn. Ha, vansubsub, homfwtfwt.

Seiqleingq caemrwgrwg, cingx-

ngaungau.

Sawqmwh, lingzlwg raen gwnz maknim miz riz lumj ribfwngz vunz nei, couh heuh malwg gvaqdaej yawj. Malwg gvaqdaej baez yawj, caen dahraix, gwnz maknim miz riz lumj yaenq ribfwngz vunz nei! Malwg naeuz: "Gij riz neix, haengjdingh dwg gij riz ribfwngz vunz daeuj gonq haenx. Seizgonq maknim caengz ndaej gwn, gyoengqde mbaengq sieng maknim le louz roengzdaej."

Yaep ndeu, lingzlwg youh hemq malwg gvaqbae. Yienzlaiz, haujlai maknim cungj miz riz ribfwngz roxnaeuz dek lo! Malwg naeuz: "Miz maz geizgvaiq? Gijneix cungj dwg bouxvunz mbaengq gvaq nyaenj gvaq!" Lingzlwg naeuz: "Bouxlawz baenzlai ndaejhoengq, cienmonz daeuj mbaengq baenzlai maknim!" Malwg naeuz: "Mbouj dwg vunz dwg duzlawz..." Caengz gangj sat, songde fwt singj lo, doengzcaez saetsing hemq hwnjdaej: "Duzfangz!" Swenj dwk bulu buet roengz ndoi.

Songde buet ha buet, roengz ndoi, gvaq lueg, cigdaengz yawjraen aenmbanj cij menh roengzdaej.

Songde baegfofo, youq gyaiejmbanj yietnaiq. Seizneix, miz geij laeq

lwgnyez yaek hwnj ndoi bae ra maknim. Naih buz ndeu fok naeuz: "Seizneix gwnz ndoi mbouj miz saek vunz, duzfangz baenz lai baenz daih, sou couh bae lo!" Fok gvaq le, youh hozraez naeuz: "Seizneix fangz iek youq gwnz ndoi gwn maknim, vih mbouj hawj vunz ceng gwn maknim, duzfangz dawz maknim cug cungj mbaengq gvaq nyaenj gvaq lo, vunz gwn le couh deng baenzbingh bw." Lingzlwg caeuq malwg dingq le, aensim youh diuqbubbub hwnjdaej, lau swheij baenzbingh.

Seizneix, boux daxgoeng ndeu byaij gvaq dingqnyie le, riu naeuz: "Buzsam ha, mwngz mbouj hawj lwgnyez hwnj ndoi gig deng, seizneix fwn raemx lai, hwnj ndoi lau deng raemxrongz roxnaeuz byad doek roengz ndoi. Hoeng, mwngz hix mbouj yungh yaeuh lwgnyez miz gijmaz fangzgvaiq ha. Lajmbwn mbouj miz fangzgvaiq, gij maknim dwg cug le youh sup gij raemxfwn, couh gag dek miz riz roxnaeuz dek vaih, ciepdwk couh naeuh lo, loengq roengz namh lo."

Yienzlaiz gij riz ribfwngz dwg riz dek! Lingzlwg caeuq malwg soeng gaemz hei q ndeu lo.

(Ganh Sozywnz/甘说文)

Docih Mwngz, Siujgyah

谢谢你，小佳

贵港市覃塘区蒙公乡古山小学六年级 韦美英

Youq gwnz diuz loh raeuz majhung haenx, cungj ndaej daengz haujlai bangcoh caeuq gujli, gou hix mbouj laehvaih, hawj gou ceiq nanzlumz dwg baengzyoux Siujgyah bangcoh gou haenx.

Haj nienzgaep seiz, hagdangz hai miz yinxdaeuz siujcuj, gou camgya lamzgiuz yinxdaeuz siujcuj, Siujgyah hix youq baihindaw. Haidaeuz gou roxnyinh dwk lamzgiuz gig mizyinx, hoeng mbouj geij nanz, gou couh roxnyinh daengz dwgrengz, aen dungcoz neix nanz hag, aen dungcoz haenx hix hag mbouj rox, gou miz di mbouj siengj lienh lo.

Siujgyah raen gou yienhneix, couh cam gou: "Meijyingh, mwngz baenzlawz la? Ngoenzneix dwkgiuz baenzneix gik." Gou lauxsaed naeuz: "Gou raen dwk lamzgiuz gig dwgrengz, mbouj siengj lienh lo." Siujgyah nyinhcaen dwk doiq gou naeuz: "Meijyingh, mwngz mbouj dwg gig gyaed dwk lamzgiuz ma? Baenzlawz di hoj neix hix souh mbouj ndaej ne? Cijaeu mwngz nyinhcaen yawj gij dungcoz lauxsae, couh yungzheih hag lo, mwngz genhciz lienh, mwngz itdingh dwk ndaej ndei, gou siengsaenq mwngz." Gou dingq gij vah Siujgyah le, aenndang miz rengz lo, couh nyinhcaen bae lienh.....

Cigdaengz roek nienzgaep, cienz yangh senj vunz bae ndaw gih camgya lamzgiuz doxdax, aenvih gou roengzrengz lienh, dwk ndaej ndei, gou ndaej senj hwnj lo.

Dwg Siujgyah bangcoh gujli gou, gou cijndaej hag ndaej baenz, docih mwngz, Siujgyah!

(指导老师:黄吉星)



Gaeqmeh Geq Ranz Gou

我家的老母鸡

贵港市覃塘区蒙公乡凌寺小学四年级(1)班 覃奕

Daxbuz gou ciengx miz haujlai gaeq, miz gaeqboux gaeqlwg gaeqhangh, hoeng ceiq yinx gou louzsim dwg duz gaeqmeh geq. Duz gaeqmeh geq ranz gou, baenz ngoenz cungj ngiengxgyaeuj enjaek byaijngoetngoet, lumjbaenz hawj vunz rox de dwg ndaw gyoengq gaeq ceiq geq nei, moix duzgaeq cungj aeu dingq de cij ndaej, mboujne saedcej couh mbouj ndei gvaq.

Geiq ndaej miz baez ndeu, daxbuz mbouj youq ranz, gou bae gueng gaeq, hoeng mbouj raen duz gaeqmeh geq, gou couh dauqcawq bae ra, laxlawz de ndoj youq ndaw gungx he, aen roujgaeq hoengzfwdfwd dwk ndwn youq gizhaenx singsang ciengqgo, gou yawjraen laj caekhaex de miz aen laengzgyaeq ndeu. Dai lo, de youh daeujdaengz aen laengzgyaeq bouxwnq okgyaeq lo. Yaephe, duz gaeqmeh byaij daengz henz gyoengq gaeq wnq bae, gij gaeq haenx couh sikhaek lumj bouxlajfwngz nei, bienq hai hawj de gwn haeux lo.

Gangjdaengz gaeqmeh ceiq gyaed gyaqlwg wnggai dwg duz

gaeqmeh geq ranz gou lo. Miz baez ndeu, gij gaeq youq henz ranz guhcaemz ra doxgaiq gwn, sawqmwh miz duz ma'iq ndeu, cunghuhu haeuj ndaw gyoengq gaeq bae, hwk dwk gyoengq gaeqlwg dauqcawq luenh buet, duz gaeqmeh raen le, lienzmuengz cung youq baihnaj daihsing hwk duz ma'iq haenx, doeklaeng gyoengq gaeq hix daeuj bang de. Duq ma'iq raen gij gaeq haenx mbouj lau cix doxgiet hwnjdaej caeuq de hoenx, lau dwk baetrieng buet deuz lo.

Neix couhdwg duz gaeqmeh geq ranz gou, mwngz naeuz de dwg mbouj dwg gig dwggayez ne?

(指导老师:陆冬群)

